



Fundasaun Mahein (FM), 12 Setembru 2017

Komunikadu Imprensa

Formasaun Governu Tarde:

Hamosu Violasaun ba Lei kona-bá Mandatu Forsa Armada Nia Xefe Estadu Maior Jeneral, Vise, Xefe Estadu Maior no Komandante Komponente sira

Relatóriu ida ne'e halo analiza husi aspetu legal sira ba asuntu sira defeza nian iha ambitu mandatu ba kargu sira Chefe Estado Maior General das Forças Armadas (CEMGFA), Vice-CEMGFA, Chefe Estado Maior das Forças Armadas (CEMFA) no Komandante Komponente sira nian. Hodi tetu ba situasaun atuál formasaun VII Governu Konstitusional nian, opiniaun legal, nomos rekomendasaun balu ne'ebé hakarak fo hanoin ba Governu foun, IV Lejislativa Parlamentu Nasional, liu-liu Prezidente Repúblika atu toma konsiderasaun.

Kontitusaun Repúblika Demokratika Timor-Leste artigu 74 n.º 2 defini Prezidente Repúblika maka Forsa Armada sira nia Komandante Supremu. Nune'e nomeasaun ba kargu sira irárkia F-FDTL nian, espesial liu, Forsa Armada sira-nia Xefe Estadu Maiór Jeneral, Vise- Forsa Armada sira-nia Estadu Maiór Jeneral, nu'udar kompeténsia rasik husi Prezidente Repúblika, tuir pontu m) husi artigu 86 Konstituisaun Repúblika Demokratika Timor-Leste.

Kazu ida ne'e antes ne'e iha inisiu tinan 2016 mosu polêmika entre Prezidente Repúblika Taur Matan Ruak ho Governu iha altura ne'eba kona-bá nomeasaun, exonerasaun no rekondusaun mandatu CEMGFA, Vice-CEMGFA no CEMFA. Polêmika ida ne'e no mosu diskusaun naruk, ikus mai rekondusaun ba kargu CEMGFA Major General Lere Anan Timur renova fila-fali no nia limite to'o tinan rua ho nia efeitu husi lora 6 Outobru 2015. Rekondusaun ba kargu Vice-CEMGFA Brigadeiro General Filomeno da Paixão de Jesus renova fila-fali no nia limite to'o tinan rua ho nia efeitu husi lora 6 Outobru 2015. Nune'e mos rekondusaun ba kargu CEMFA Coronel Falur Rate Laek renova hikas ba periodu tinan ida ho nia efeitu husi lora 6 Outobru 2016.

Signifika mandatu CEMGFA, Vice-CEMGFA, CEMFA no Komandante Komponente sira nian ne'ebé sei ramata iha lora 6 Outobru 2017. Maibe to'o agora seidak iha sinal kona-bá nomeasaun foun ba kargu sira ne'e. Nune'e mos kargu sira CEMGFA no Vice-CEMGFA labele ona rekondus ka renova fila fali sira nia mandatu. Tamba sira hotu asume ona mandatu periodu rua tui-tuir malu desde tinan 2011 no rekondus iha tinan 2015 (Dekretu Prezidente 2016), nomos passa ona ba idade reforma. Inklui mandatu CEMFA nian ne'ebé ramata ona iha tinan 2015 ba periodu rua nian no rekondus hikas iha tinan 2016 no tuir Dekretu Prezidente Repúblika nian tinan 2016 nia limite to'o deit tinan ida.

Iha tempu hanesan VII Governu Konstitusional seidauk simu posse no Governu atual ka Governu de Jestaun la iha poder Konstitusional no legal hodi toma desizaun ba asuntu ne'e. Nune'e mos Konsellu Superior Defeza no Seguransa ne'ebé hanesan orgaun konsulta Prezidente Repúblika nian ba materia sira Defeza no Seguransa to'o agora seidauk funsiona. Maske tuir Lei Organika Konsellu Superior Defeza no Seguransa enkontru regular konsellu nian akontese kada fulan tolu. Ironiku liu tan membru na'in rua ne'ebé Prezidente Repúblika hili to'o agora seidauk eskolla. Portantu Konsellu Superior Defeza no Seguransa hanesan orgaun ida ne'ebé Prezidente Repúblika prejide hodi konsulta kona-bá asuntu sira nomeasaun no exonerasaun CEMGFA, Vice-CEMGFA, CEMFA no Komandante Komponente sira nian.

Ida ne'e iha possibilidade boot sei viola tan lei sira tamba Governu foun la iha biban hodi toma lalais desizaun hodi halo konsulta sira iha Konsellu Superior Defeza Militar no lori ba Konsellu Ministru hodi aprova, no ikus liu lori ba Prezidente Repúblika hodi nomea no dekreta.

Rekomendasaun

1. Atu instituisaun sira Governu, F-FDTL, no Prezidente Repúblika konsidera asuntu importante ida ne'e, tamba sira nia mandatu maioria sei remata iha inísiu fulan Outubru 2017.
2. Ministériu Defeza (Ministru Defeza) foun atu halo ona konsultasaun no audisaun ho Konsellu Superior Defeza Militar (F-FDTL), atu antisipa prosesu, nomos mandatu ba Chefe Estado Maior Coronel Falur Rate Laek ho Komandante Komponente sira ne'ebé sei remata iha loron 6 Outobru Outubru 2017.
3. Ministru Defeza foun presiza haree lakuna balu kona-bá baze legais ba extensaun mandatu CEMGFA ho Vice-CEMGFA, tamba nomeasaun no extensaun ba sira nia mandatu, Prezidente Repúblika nomea bazeia ba Dekretu-lei EMFAR anterior ne'ebé ho períodu tinan ida tamba kestaun idade.

Atu hetan informasaun kle'an liu kona-bá asuntu ne'e bele kontaktu:

Nélson Belo

Diretor Ezekutivu

Email: direktor.mahein@gmail.com

Telemove: (+670) 78316075 ka 77561184

Website: www.fundasaunmahein.org